

APOKORÍPISI

Xesosi Kristo Iuaka Oerekiniua Pirena

Ia Aãtsopa Oerekaua Xesosi Kamakiti

1 ¹Ia aãtsopa oerekari Teoso nakitiakori Xesosi Kristo paĩtiki kamaenetakiti. Teoso iokanatarini ititiri iaxitikiri Xoãomoni Xesosi Kristo kamaenetakiti oerekini ĩkapani. ²Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kĩpitakanimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴Nota Xoão. Niokanatarini ia niõkatsopare Teoso mereẽkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapirĩka iua aua. Iua ãtipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. ⁵Xesosi Kristo apaka sikari erekari hĩtemoni. Atão inakarinoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tiretakari. Ipina ate ĩkapani amaerekani imakatkakini ĩkapani, ininiã isikakaua erekari akamini ĩkapani. ⁶Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ãtipirika peerekai pite. Ãtipirika pitenokara kaposotiireri. Ameẽ.”

⁷Hätamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ìpiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

⁸Apiananiri txari:

—Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiiretxi aua notamoni —itxa.

Xoão Atamatarì Aĩtari Iaxitikiri

⁹Nota Xoão, hĩtari. Nikamari Xesosi Kristo nireẽkiti, ininiã himoianari nitxaua, kotxi ãtipirika nimiteenekari nimsiritiko, hĩte misiritiko himiteenekini atoko. Ikara misirikaretxi apokapitika atemoni, kotxi aãuĩte Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kãkiti takano nota uai. ¹⁰Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpeta atoko nikenakota. ¹¹Itxari:

—Kãkiti apisapanika naua nota. Nota auapanika ikinipoko xipokaãka atoko. Piõkatsopata aãtsopaã patamatakiti tĩkane. Eereka piokanatarì iua aãtsopa kãkiti Teoso mereẽkinimoni setxi sitatxiti auakanimoni Ásia tixineẽ. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹²Ininiã eereka nikirioka notakata sãkirauatakari natamatini ìkapani. Nikiriokasaaki, natamatari setxi tirikapi topãkini oro kamakori. ¹³Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatare atoko oro kamakoro aua itorotamoni. ¹⁴Iãko iteene kasarori mapoa atoko itxa. Xamina tirinakari atoko itxa oki. ¹⁵Ikiti mẽkorĩka pirõsi xamina ãki imẽkorĩkini atoko. Isãkire ene ãparaã torõkani atoko. ¹⁶Iuako ikikomoni imaĩkaro setxi iõriki. Inamaã iouata mitari pokĩka. Iua iouata ipi uanaro aua. Atokatxi iotximere atoko itxa itoõ.

¹⁷Natamatakasaakiri, nirika ikitimoni. Koriākari atoko nitxa. Ininiã iuasaaki itakari iuako ikikomoni nota nopini. Itxano: —Kona pipīkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸Nota auãkipika inakarino. Nota koriākaripekano, iuaritika hātamatano. Ātipirika auãki inakarino nota. Ameẽ. Kaposotiireno nota, kotxi nipaniātari kãkiti ipinini. Niposotiire aua niokanatiniri kãkiti maerekati kamakani misiritikoãtaã. ¹⁹Piõkatsopatari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi noerekaiko katana itiximoni ĩkari. ²⁰Kiripa ninoa iõriki setxi pakini niuako nikikomoni auakani? Teoso nitiriakori itxauana. Ninoa anikari nota sãkire nisãkire auĩãkanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auĩãkani ninoa setxi sitatxi auakani itxauana —itxa Xesosi Xoãomoni.

Xesosi Iokanapirena Épeso Auakanimoni

2 ¹Xesosi misãkiretari Xoão: —Piokanatariko ia nisãkire Teoso nitirimoni, Teoso sãkire auĩãkanikata auakarimoni Épeso sitatxitiã:

Ninoa setxi iõriki maĩkakarino nota. Nimaĩkari ninoa iõriki niuako nikikomoni. Ninoa setxi tirikapi topãkini oro kamakori sauaki tĩpokotakarino nota. Ia nota sãkire. ²Nimarotari ikinika hĩkamakiti. Nimarotari itori parĩkatxi pamimari hĩkama. Parĩkatxi kamimari inakasaaki, kona hĩtakanapari. Maerekati kamakani apokasaaki hĩtemoni, kona hĩte apakapana. Apokapeka apanakini kãkiti hĩtemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hĩte auiritana ninoa kaminiri maerekati. Hĩte atamakaerekatana. Eereka himarotari kona atão ninoa sãkire. ³Himisiritaãka nisãkire hĩsãpiretini xika, iuaritika himĩteenekari ikinipoko nota ĩkapani. Kona hĩsãpaka hĩparĩkauatini nota ĩkapani.

⁴Ikara hĩkamakiti erekari, txamari hĩtakanapari hĩtiretinino. Merepanika hĩtiretano. ⁵Hĩxinikariko merepitipanika hĩtiretinino. Uatxa poiãoka hĩtiretano. Iuaĩkana hĩkamariko merepitipanika hĩkamakiti atoko. Himatakanapakaniãri ikara himaerekani, patimari napokini hĩtemoni. Nimakatzakariko hĩtirikapite topãkini. Ininiã Teoso sãkire auĩãkani !uaaika ereẽ, himatakanapakaniãri ikara himaerekani. ⁶Auapitika atão

hĩkamakiti, kotxi hĩte omanatari Nikoraito inakoni kamakiti.
Nota apaka omanatari ninoa kamakiti.

⁷Kakenakokii hĩte, ininiã hĩkenakotariko Erekar
Matamatakoti sãkire Teoso sãkire auiaãkanimoni. Maerekati
makamakati nauiritako amãtiiri Teoso tixine apanĩkaki auakari
itximini. Iua amãtiiri tximakari auapika ãtipirika Teosokata,
—itxa Xesosi Épeso auakanimoni.

Xesosi Iokanapirena Esimina Auakanimoni

⁸—Piokanatariko ia nisãkire Teoso nitirimoni, Teoso sãkire
auiaãkanikata auakarimoni Esimina sitatxitiã:

Ikinipoko auini apisapanika nota aua. Ikinipoko xipokaãka
atoko, nota auapanika. Nipĩpe, iuaritika iuaĩkana nõkitikaua.
Uatxa !nipinaika. Ia nota sãkire. ⁹Nimarotari hãtatsiire.
Nimarotari hĩte minakati !uari. Iuaritika ikinipoko erekari
aua hĩtemoni. Nimarotari apanakini misãkirepiretinii hĩte.
Ninoa txa: “Xoteoakorira ate.” Txama kona atão Xoteoni
!itxauana. Ninoa apotiitiniãtaãua Satanasi nakiti. ¹⁰Kona
hĩpĩkapiri himisiritiko ĩkapani ĩkari. Satanasi takari apanakini
hĩte kateia ãki ataekatinii ĩkapani. Himisiritaãkako tesa
pakini õti. Atxiĩti hĩpina nisãkire hãuikini xika, iuaritika
kona hĩtakanapapiri nisãkire hãuikini, ininiãkara nisikai
ãtião saporieãta. Iua saporieãta apakapakari auapika ãtipirika
Teosokata.

¹¹Kakenakokii hĩte, ininiã hĩkenakotariko Erekar
Matamatakoti sãkire Teoso sãkire auiaãkanimoni. Maerekati
makamakati kona iuaĩkana ikoriãika,
—itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹²Eereka Xesosi iuaĩkana misãkiretari Xoão:
—Piokanatariko ia nisãkire Teoso nitirimoni, Teoso sãkire
auiaãkanikata auakarimoni Pékamo sitatxitiã:

Notamoni auari oa iouata ipi uana auakito. Ia nota sãkire.
¹³Nimarotari ikinika hĩkamakiti. Nimarotari hãuiniãtaã. Ereẽ
Satanasi kãkiti auĩte itxaua. Iuaritika hĩte auikari nota sãkire.
Kona hĩte takanapari nisãkire hãuikini. ãtxipa inakori auama
hĩte sauaki. Iua sãpiretapikari nisãkire kãkitimoni. Ikara xika

okapeêka ereẽ Satanasi auiniãtaã. Iuaritika kona hãsikano.
!Hítakanapari nisãkire hãuikini.

¹⁴Txamari auapitika hïkerokakiti. Aua kãkiti hïte sauaki Paraão inakori sãkire auiãkani. Kitxakapirïka iua oerekari Paraki inakori kãkiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kãkiti kaminiri maerekati iïto nireêkiti äti kãkiti itokata. !Apakata kãkiti auikiniri Paraão sãkire. ¹⁵Hïte sauaki aua kãkiti Nikoraito inakoni sãkire auiãkani. Nota omanatari ninoa auiãkiti sãkiretxiti. ¹⁶Hítakanapariko ikinika himaerekani. Hïkanapiriãko notamoni. Ikara atoko himakamakaniã, patimari hïtemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷Kakenakokii hïte, ininiã hïkenakotariko Erekari Matamatakoti sãkire Teoso sãkire auiãkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iøkataãka kãkiti uãka amaneri apanakini mimarotakiniti. Apakapakarinani imarotari iuãka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸Eereka Xesosi iuaïkana misãkiretari Xoão:
—Piokanatariko ia nisãkire Teoso nitirimoni, Teoso sãkire auiãkanikata auakarimoni Txiatxira sitatxitiã:

Teoso äkirirano nota. Noki xamina tirinakari atoko itxa. Nikiti mëkorïka pirõsi atoko itxa. Ia nota sãkire. ¹⁹Nimarotari ikinika hïkamakiti. Nimarotari hïtiraõki. Nimarotari iteene hãuikari nisãkire. Nimarotari iteene hïparïkauata nota ïkapani, apanakini ïkapani apaka. Hïparïka nota ïkapani pasãpaniri inakasaaki, iuaritika hïkamapanikari nota ïkapani. Uatxa apiaãpota hïparïka nota ïkapani.

²⁰Itxama, nisãpiretaiko hïkerokakiti. Hïte auiritaro sito, Xesapeo inakoro, maerekati okamini hïte sauaki. Oa txa: “Teoso sãkire sãpiretakarona nota.” Otxama, omisirienetana ninitiriakori. Oa xika, ninoa kamari maerekati iïtona nireêkiti apanakinikata isirïkinina. Apaka ninoa nikari nipokori teoso kamakori sikakori. ²¹Niãtapari otakanapiniri omaerekani, txamari kona onirekari

otakanapiniri omaerekani. ²²Ininiã nota kamariko oa amianatini. Oakata sirĩkakani matakanapakaniãro, iteene ninoa atatsirauata. ²³Oa anaakori nokapitikako. Ikara atoko inakasaaki, ikinimane Teoso sãkire auĩãkani imarotariko nimarotari ikinika kãkiti ãkixinire, ikinika ixinikakiti pakini. Ininiã erekari nisikako erekari kamakanimoni. Apaka nimisiritari maerekati kamakani. Hĩkamakiti iaõka niĩkitxitai hĩte.

²⁴Uatxa nimisãkiretai hĩte apanakini Txiatxira sitatxiti auakani. Hĩte auikari Teoso sãkire. Hĩte !auikari Xesapeo sãkire. Hĩte kona apaiaõkari Satanasi oerekakiti, iua imarore. Kona ninirekari nisikinii apikomoni parĩkatxi nota ĩkapani, kotxi uatxa iteene hĩparĩkauata nota ĩkapani. ²⁵Ianoka ninireka hĩkamini. Hĩte auikari nisãkire, ininiã hãuikiniritika nisãkire, nikanapiriãko.

²⁶Iua maerekati makamakati, ãtipirika nipaniãtakiti kamakari, iuamoni nisikariko niposotiire itixi auakani auĩte ininiua. ²⁷Teoso sãkire kitxakapirĩkari txari:

Auĩtetxi itxauako. Itapararitika ipaniãtana ninoa inireẽkiti ikaminina. Imakamakaniãrina inireẽkiti, imisiritana ninoa, tiĩtxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸Apaka nisikariko iõriki ĩkanõkapanikero iuamoni, ininiã notaka nisikaua iuamoni, kotxi iua iõriki atoko nitxaua.

²⁹Kakenakokii hĩte, ininiã hĩkenakotariko Erekari Matamatakoti sãkire Teoso sãkire auĩãkanimoni, —itxa Xesosi Txiatxira auakanimoni.

Xesosi Iokanapirena Satxi Auakanimoni

3 ¹Iuaĩkana Xesosi misãkiretari Xoão:

—Piokanatariko ia nisãkire ninitirimoni, Teoso sãkire auĩãkanikata auakarimoni, Satxi sitatxitiã:

Notamoni aua ninoa setxi Matamatakoni Teoso nakiti. Notamoni aua ninoa setxi iõriki. Ia nota sãkire. Nimarotari hĩparĩka. Apanakini sãpiretai hĩte auãki hinini hĩxinire, txamari Teosomoni koriãkanipekarai hĩte. ²Himereka. Araõkire hĩtxapaniko. Hĩsikataparatariki erekari hãkixinireẽ auakari, kotxi iua erekari ipinaariãpota. Ininiã hĩtxĩkitakari iua erekari auãki inini iuaĩkana. Notamoni hĩparĩka Teoso apisatoõ na atão. ³Hĩxinikariko hãpakapakiti, apaka hĩkenakotakiti. Hĩkĩpitariko hĩkenakotakiti.

Hítakanapariko maerekati. Erekarí hīkamako, kotxi kiītiriri apokini atoko napokako uai. Kākiti kona imarotari kiītiriri apokini manapi. Ikara atokokana nitxako nikanapiriākasaaki.

⁴Hīte Satxi sitatxiti auakani sauaki auapanika apanakini maerekati makamakani. Ninoa auikapitikari nisākire. Ninoa kākiti imāka matxikotakani atoko itxana. Ininiā notakata isanako. Imākana kasarori. Ikara atoko nikaminana, kotxi ninoa kamari erekari nipaniātakiti.

⁵Maerekati makamakani ieretakariko mākatxi kasarori. Kona noakapaniriko iuākana naātsopateē. Kākiti iuākana ikara aātsopaā auakani ātipirika auapikako Teosokata. Ikara atoko ininiā, nisāpiretari iuākana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶Kakenakokii hīte, ininiā hīkenakotariko Erekarí Matamatakoti sākire Teoso sākire auiākanimoni,
—itxa Xesosi Satxi auakanimoni.

Xesosi Iokanapirena Piratéopia Auakanimoni

⁷Iuaīkana Xesosi misākiretari Xoão:

—Piokanatariko ia nisākire Teoso nitirimoni, Teoso sākire auiākanikata auakarimoni Piratéopia sitatxitiā:

Nota maerekati makamakatirano. Atāo inakaranani sāpiretakarikarano nota. Kaposotiireri auītetxi Tavii inakori atoko nitxa, kotxi nota matakakakiti, kona āti totari. Nota totakiti kona āti matakakari. ⁸Nimarotari hīte parīka. Hātamata. Hīparīka nota īkapani aapokotxi tore matakakakori atoko itxa. Kona āti posotari iseretiniri. Ininiā kākiti liposotari iotokakinii hīte nisākire hīsāpiretini. Ikara atoko nikaminii hīte, kotxi kona kataparai hīte. Ikara atoko nikaminii hīte, kotxi hīkīpitari nisākire. Kona hīkipatari nisākire apanakini apisatoō. ⁹Apanakini txari: “Atāo Xoteoakori atxaua.” Txamari Satanasi nakitiakori itxauana. Paxirari ninoa sākire. Nikamariko ninoa kapotoreēkiniāua hīte apisatoō. Iusaaki ninoa txako: “Atāopitikara Xesosi tiretapitikai.”

¹⁰Hīkīpitapekari nisākire. Kamonōkoniri inakasaaki, kona hītakanapari nisākire, ininiākara apia maerekati ikini itixiti apokasaaki, iusaaki ninikataiko hīte. Iua maerekati kona misiritai hīte. Iua maerekati apokako itixi auakani atamakaerekatini īkapani.

¹¹Erepaniko, patimapaniriko napokini ereẽ. Ātipirika hīkamarike erekari. Hītakanapapikariko maerekati. Ininiã iuasaaki āti kona posotari imakaxakiniri auítetxi saporietane hītemoni nisīkakiti. !Imakaxakarina ikara hīparīka ĩki. ¹²Nīkamarike maerekati makamakati itīkare mina atoko inini niTeosone misākiretiko aikoti āki. Auapika Teoso misākiretiko aikoti āki, ininiã !itakanapari Teoso sākire. Niōkatariko niTeosone uāka iua nopini. Apaka niōkatariko Teoso sitatxine uāka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareẽ amaneri iua tixine katxakakari. Iua maerekati makamakati nopini niōkatariko apaka nota uāka amaneri.

¹³Kakenakokii hīte, ininiã hīkenakotariko Erekarī Matamatakoti sākire Teoso sākire auīākanimoni, —itxa Xesosi Piratēopia auakanimoni.

Xesosi Iokanapirena Araotxiséia Auakanimoni

¹⁴Iuaīkana Xesosi misākiretari Xoão:
—Piokanatariko ia nisākire Teoso nitirimoni, Teoso sākire auīākanikata auakarimoni Araotxiséia sitatxitiã:

Niuāka “Ameẽ.” Nota atão sākiretxiti sãpiretakarīkarano. Nīkamari ikinika nisãpiretakiti. Merepanika nīkamari ikinipoko. Ininiã ikinipoko auíte nitxaua nota. ¹⁵Nīmarotari ikinika hīparīka. Hītixari: “Nauīkapitīkari Xesosi sākire.” Txamari kona iteene hinirekari hīkaminiri nīpaniātakiti. Apaka kona iteene hinirekari hītakanapiniri nisākire. Kona kapatakari atokoni hītixaua hīte. Kona katxīkareri atokoni hītixaua hīte. Poomari atoko hītixaua. Notamoni apiaerekata kapatakari atoko hininiua hīte. Iuasaaki iteene hinirekari hīparīkauatini nota ĩkapani. Iteene himanirekakaniāri hīparīkauatini nota ĩkapani, apiaerekata katxīkareri atoko hininiua hīte, nisākire ikinika hītakanapini. ¹⁶Notamoni hīte āparaã poomari atoko hītixa. Ininiã kona āparaã kapatakaāri atoko !hītixa. Apaka kona āparaã katxīkareẽri atoko !hītixa. Ikara atoko inakasaaki !nīnīrekai. Ininiã mapara nīkanakai hīte. ¹⁷Hīte txa: “Katxineiroteua ate. Katiūa ate. Apikomoni anīrekakiti !uari,” hītixa. Txama kona himarotari hākixinireẽ iteene himatinaniuatini. Hākixinireẽ minakati !uari. Hākixinireẽ mokiri atoko hītixaua. Kasarari atoko hītixaua hākixinireẽ. Ikara atoko hininiã, kona himarotari Teoso. ¹⁸Nōtākikai hīte hiamotiniri

notamoni auakari oro atoko inakari. Oa oro xamina oeretakito. Ikara atoko hīkaminiā, ikinika hinirekakiti auako hītemoni. Hiamotariko mākatxi kasarori notamonikiri hīeretakini īkapani, ininiā kona hīpētauata kasara hinini xika. Ikara atoko hīkaminiā, hākixinire !uari maerekati. Hiamotariko apaka pinītxi notamoni auakari hōki īkapani, ininiā atāo hīposota hātamarauatini.

¹⁹Nitiretakini nōtākika, apaka noerekana. Ininiā ikinipoko atāo hīkamako maerekati hītakanapini īkapani. ²⁰Hātamatako. Hākixinire toreē nota auapeka. Nota haāpoko maparakiri akiritakari atoko. Hīkenakotiniāri nakiritinii, hōsereiniāri hākixinire tore, niīroā hītekata nikaikotini īkapani. Iuasaaki ninipokota hītekata. Hīte nipokota notakata.

²¹Nauiritari maerekati makamakati topākini notakata auītetxi topanere nopini. Iua auītetxi topanere nota nakiti. Iua atokotxikana nota topāka nirikata auītetxi topanere nopini iua nakiti nopini, kotxi maerekati makamakati nota apaka txaua. ²²Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni, —itxa Xesosi Araotxiséia auakanimoni.

Iaxiti Auītetxi Topanere

4 ¹Eereka natamatari iaxiti tore. Itore imatakakaāka. Merepanika nikenakotari trōpeta atoko inakari. Kākiti sākire atoko itxa. Imisākiretano:

—Uai pina notamoni. Noerekaiko katana auakari tīkane.

²Iuasaakipeka Erekarī Matamatakoti anikano. Iuasaaki natamatari auītetxi topanere iaxiti. Topākakari aua iua nopini. ³Iuaā topākakari kai peereri pomēkoriri atoko itxa. Iua kai satōnia inakori atoko. Apaka āti kai sátxio inakori atoko itxa iua topākakari. Kisi ākitari iua auītetxi topanere. Iua kisi kai esimeráota inakori atoko itxa.

⁴Iua itinikata aua vītxi koatro pakini topaneretxi. Vītxi koatro pakini totiakori topāka iua topaneretxi nopini. Ninoa māka kasarori. Ikiina aua saporīēta oro kamakori. ⁵Auītetxi topanereātaā atamataāka ito mēkokari. Iotxira, iokaamori aua iuaātaā. Iteene poenexitiri. Iua auītetxi topanere apisatoō aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶Iua auītetxi topanere apisatoō ipoa ātakaāri atoko itxa. Auītetxi topanere itinikata aua koatro Teoso tixine auakani. Ninoa okīt xinoka

xãpokaĩtotakini. Auana okina ikini iĩtoãna. Itorotaãna aua okina. Iporikiãna apaka aua okina. ⁷Okĩtxinoka xãpokaĩtotakiti ãti, ãkiti atoko itxa. Átipekana kema auĩte atoko itxa. Átipekana aua kiki toõ atoko. Átipekana kokoi araãkari atoko itxa. ⁸Ninoa ikininape aua imĩkitana seisi pakini. Imĩkitana nopini, ipatapi apaka okina aua. Kona itomatana. Ikini pokamarariti, ikini iĩkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Átipirika auakarii. Kitxakapirĩka auakarii. Uatxa auakarii. Katana apaka pite auapanika,”

itxana átipirika.

⁹Ninoa okĩtxinoka xãpokaĩtotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate iĩkapani erekarinoka. Peerekari iua auĩtetxi topanere topãkakari, átipirika auapika inakari.” Ninoa xikaretari ikara Teoso iĩkapani. ¹⁰Ninoa vĩtxi koatro pakini totiakori xikarauatakasaaki, ikapotoreẽkauana ixitimoni iua auĩtetxi topanere nopini topãkakari apisatoõ. “Ateosone,” itxana iua átipirika auapika inakarimoni. Itakarina isaporiẽtane Apiananiri apisatoõ, kotxi Teosonokara ikinimane auĩte. Iuusaaki itxana:

¹¹“Apiananiri, aTeosone pitxaua. Erekai pite, ininiã apakatapitika apaxitinii. Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vĩtxi koatro pakini totiakori.

Aãtsopa Iapiriãkori Pirena

5 ¹Iuusaaki natamatari aãtsopa iapirikakori iua auĩtetxi topanere nopini topãkakari uakoã. Iuako ikikomoniakiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamẽkakaniri iĩkapani. ²Iuusaaki natamatari ãti Teoso nitiri iaxitikiri. Kataparari iua. Itapasãkireritika itxa:

—Kiripa apakata imaktxakiniri ia popitari? Kiripa posotari ikatamẽkiniri ia aãtsopa? —itxa.

³Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamẽkakarĩ !auari. Ninoa !posotari ikatamẽkinirina iua aãtsopa. !Iposotarina atamatinirina iua aãtsopa ãki.

⁴Ininiã iteene nitxiapata, kotxi iua aãtsopa iapiriãkori katamêkakari lauari. Erekarî kamakari !apokaãka ikatamêkiniri îkapani, atatsopatiniri îkapani. ⁵Iuasaaki ninoa totiakori âti txari notamoni: —Kona pitxiapatape. Patamata ikiraã. Âkiti atoko inakari iua. Xotaa apika mekaniriakori auîte iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamêkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

⁶Iuasaaki natamatari soti auîte okakori atoko. Iua itima iua auîtetxi topanere apisatoõ. Ninoa ipi ipi pakini okîtxinoka xãpokaîtotakini, ninoa totiakori pakini âkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷Iua soti auîte atoko inakari sari iua auîtetxi topaneremoni. Imaîkari aãtsopa topaneretxi nopini topãkakari uakoã auakari. Iuako ikikomnikiriã aua. ⁸Imaîkasaakiri, ninoa koatro okîtxinoka xãpokaîtotakini, ninoa vîtxi koatro totiakori pakini patimari ipamakinina soti auîte apisatoõ. Ikinikana auari arpa inakori xikari ikaminina îkapani. Imakinikana auari kopitipaki oro kamakori. Naia kopitipaki xãpoka koria atoko inakari peeremariri. Ia kamariãro Teoso sãkire auiãkani sãkire iuamoni.

Amaneri Xikariti

⁹Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aãtsopa iapiriãkori. Pitenani apakata pimaktxakiniri popitari, kotxi pitenanira erekari. Pite okaãka. Piarêkaã piamotaua ate Teoso îkapani. Piamotapekaua ikini uãkati kãkiti sauaki. Ikini âti uãka sãkire sãkiretakani sauaki piamotapekaua. Ikinika itixiti auakani sauaki piamotapekaua ate.

¹⁰Pite txîkitakaua ate auîtetxiakori aniniua, sasetotxiakori apaka aniniua, Teoso îkapani aparîkauatini. Ininiã itixi auakani auîte atxauako ate.”

¹¹Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Seî mio, apikomoni seî mio, apikomoni seî mio itxaãpokatana. !Apakata ninoa iaõtiko. Ninoa âkitari iua auîtetxi topanere, okîtxinoka xãpokaîtotakini, totiakori pakini. ¹²Itaparásãkireritika ixikarauatana. Itxana:

“Soti auíte okaãka kãkiti ìkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³Ikara eereka nikenakotari ikinika iaxiti auakani, ikinika ìkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Ikinika erekari ãtipirika aua iua auítetxi topanere topãkakarimoni, iua soti auíte pakinimoni. Ikinika ãtipirika paxitana. Ikinika ãtipirika txari: ‘Peerekana ninoa.’ Ikinika taparãtxi ãtipirika aua ninoamoni.”

¹⁴Ininiã ninoa koatro, okítxinoka xãpokaítotakini txana: —Ameẽ.

Iuusaaki ninoa vïtxi koatro totiakori patimari pamakini. —ATEosone pitxaua —itxana iua ãtipirika auakarimoni.

Soti Auíte Makatxakari Popitari

6 ¹Natamatari soti auíte makatxakiniri ãti popitari. Ikara natamatakasaaki, nikenakotari okítxinoka xãpokaítotakiti sãkire. Isãkire ikarokirauatini atoko itxa.

—Uai pinako. Patamata —itxa.

²Iuusaaki natamatari kavaro kasarori. Kiki aua oporikiã. Iua tapotxi aua. Auítetxi saporietane sikaãka iuamoni. Iua sari ikini itixitimoni kãkiti auíte ininiua ìkapani.

Ãti Popitari Makatxakiko

³Eereka soti auíte makatxakari ãti popitari aãtsopaã, ininiã ipi auape. Iuusaaki nikenakotari ãtipekana, okítxinoka xãpokaítotakiti sãkire:

—Uai pinako. Patamata —itxa.

⁴Ikara eereka natamatari kavaro pøkamarari. Kiki aua oporikiã. Iua kiki sikaãka posotiiretxi neenamtxi ikamini ikini itixitiã, ininiã neenamtxi mauakaniãtaã !uari. Itxïkitakari kãkiti okakakiniua. Isikaãka iouata mitapoari ineenamauatini ìkapani.

Āti Popitari Makatxakiko

⁵Eereka soti auīte makatxakari āti popitari, ininiā ipi āti auape. Iuasaaki ātipekana, okīt xinoka xāpokaīt totakiti txari:

—Uai pina. Patamata —itxa.

Ininiā iuasaaki natamatari kavaro pomamari. Kavaro nopini topākakari aua minari iaōtiko iuakoā. ⁶Eereka nikenakotari āti sākirauatini okīt xinoka xāpokaīt totakini sauaki. Itxa:

—Ipixini kiro triko īki, āti ōti kākiti parīka īkitxikana. Āti, ipixini pakini kiro atarokiri atoko inakari īki, āti ōti kākiti parīka īkitxikana. Iītxiā īki, ovaā īki pakini poiāopanikako.

Āti Popitari Makatxakiko

⁷Eereka soti auīte makatxakari āti popitari, ininiā ipi ipi pakini auape. Iuasaaki nikenakotari imapotōkirekiri, okīt xinoka xāpokaīt totakiti sākire. Itxari:

—Uai pina. Patamata —itxa.

⁸Iuasaaki natamatari kavaro posētakari. Inopini topākakari uāka “Ipīkitxi” inaāka. Āti iua tikini sa. Iua akiritaāka “Maerekani Misiritikoātaā” inaāka. Isikaākana posotiiretxi kaiāopokori itixi auakani okiniua īkapani, ininiā koatro kākiti auiniātaā āti okaāka. Ninoa okana kākiti neenamatiā, natxiā, amianariā, kaxipiri kaneenamariā pakini.

Āti Popitari Makatxakiko

⁹Ininiā soti auīte iuaīkana makatxakari āti popitari, ininiā ipi ipi āti pakini auape. Iuasaaki natamatari Teosomoni sikakori takikoātaā patapi kākiti okakoni. Ninoa okaāka Teoso sākire isāpiretinina xika. Kona itakanaparina isāpiretinina Teoso kamakiti ninoa īkapani, ininiā ikara xika okaākana. ¹⁰Itapasākireritika akirikatarina Teoso. Itxana:

—Apiananiri, ātipirika erekari kamakarii pite. Atāonoka pisākire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹Ininiā mākatxi kasarori sikaāka ninoamoni. Eereka isāpiretaākana:

—Hiātapariko apikomoni. Teoso nirekari apanakini hītariakori, initiriakori okiko hīte atoko iniko. Hītariakori okaāka atoko, Teoso xikatxitai hīte. Hiātapariko ikara ōti —itxa.

Āti Popitari Makatxakiko

¹²Eereka nitikari soti auīte makatxakiniri āti popitari, ininiā seisi pakini auape. Iuasaakipeka itixi iteene iakeēkata. Atokatxi mamāka, sako mata pomamari potxi iāko kamakori atoko.

Kasiri kamarāka arēkatxi atoko. ¹³Iōriki itori iaxiti auakaro irika iikorapokoritimoni. Amātiiri itima iokatxaākiti atoko otxa.

¹⁴Natamatari iaxiti aātsopa iapirikiniua atoko. Ikinika ixirata mitari, ikinika ipokomiriī pakini makatxakaāka. Ātiātaā itakaāka.

¹⁵Iuasaaki iikorapokoriti auītetxiakori, kākiti kaposotiirerini, katiirini, sotato auīteakori, kākiti katapararini, nitiritxi amotakoni, nitiritxi minakaniua pakini kipataua aarikoā, kai mitari sauaki ixirataā. ¹⁶Iuasaaki itxana ixirata auītemoni apaka kai mitarimoni:

—Hirikako ate nopini. Hikipataua, kotxi topaneretxi nopini topākakari, soti auīte pakini nirekari imisiritiniua ate. ¹⁷Soti auīte misirikare ōti manapi apopeka. Kona kākiti mīteenekari ikara misirikaretxi.

Sēto Koarēta Koatro Mio Teoso Nitiriakori Itixi Auakani

7 ¹Eereka natamatari Teoso nitiri iaxitikiri timini atokatxi pokīkinimoni, āti atokatxi ereēkokinimoni, āti atokatxi kimapore sanaremoni, āti atokatxi kimapore kikomoni. Ininiā ipi ipi pakinipe ninoa. Ninoa maīkari itima ipi ipi pakini itixi auakari itimati. Ininiā itima kona inapaika itixiā. Kona kāuaāriā !inapaika itima. Kona aaminaā !inapaika itima. ²Natapari āti Teoso nitiri iaxitikiri inaāpotini atokatxi pokīkinimoni. Teoso ātipirika auakari takaōtxikare aua iuamoni. Itapasākireritika akiritana ninoa ipi ipi pakini Teoso nitiriakori. Ninoa parīka itixi, potxoari uiniti pakini imisiritinina. ³Iua Teoso takaōtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaōtxikare initiriakori itixi auakani teētaā.

⁴Eereka nimarotari Teoso takaōtxikare apakapakani. Itakaōtxikaākana sēto koarēta koatro mio kākiti. Ikini uāka Isaeo tixinikini takaōtxikaāka.

⁵Tosi mio Xotaa apika mekani takaōtxikaāka.

Tosi mio Hopē apika mekani takaōtxikaāka.

Tosi mio Katxi apika mekani takaōtxikaāka.

⁶Tosi mio Asee apika mekani takaõtxikaãka.
 Tosi mio Natarii apika mekani takaõtxikaãka.
 Tosi mio Manasee apika mekani takaõtxikaãka.
⁷Tosi mio Simião apika mekani takaõtxikaãka.
 Tosi mio Arevii apika mekani takaõtxikaãka.
 Tosi mio Isakaa apika mekani takaõtxikaãka.
⁸Tosi mio Seporõ apika mekani takaõtxikaãka.
 Tosi mio Xosee apika mekani takaõtxikaãka.
 Tosi mio Pëxamiĩ apika mekani takaõtxikaãka.

Itomaneri Kãkiti Teoso Apisatoõ

⁹Ikara eereka natamatari itomaneri kãkiti apotiitakaniaua.
 !Apakata kãkiti iaõtiniri ikinikana. Aua kãkiti ikini itixitikini, kãkiti ikini sereti. Aua ikini uãka sãkire sãkiretakani. Ikinikana ninoa timanãta Apiananiri apisatoõ, soti auĩte pakini apisatoõ. Ninoa mãka kasarori. Aãtape aua iuakoãna. ¹⁰Itaparasãkireritika itxana:
 —ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

¹¹Iuasaaki ikinika Teoso nitiriakori iaxiti auakani tima. Ninoa ãkitana auĩtetxi topanere, totiakori, ninoa ipi ipi okĩtxinoka xãpokaĩtotakini pakini. Ikapotoreẽkauana itoõna xitimoni, auĩtetxi topanere apisatoõ.
 “Ateosone pite,” itxana Teosomoni. ¹²Ixipoãtana Teosomoni:

—Ameẽ. ãtipirika ikinimane sãpiretai ereka pinini. Peerekai. Kimarorei. Erekarı pikamakiti ate ĩkapani. Ikinimane paxitai. Kaposotiirei. Pataparai. ãtipirika ikara atoko atxai. Ameẽ.

¹³Ininiã eereka ninoa totiakori ãti pimaãno nota:
 —Kiripa ninoa kãkiti mãkatxi kasarori ieretakakani? Namonipa inana ninoa? —itxa iua.

¹⁴Ininiã nota txari iua:

—Pitera imarotari.

Ininiã iua txano:

—Ninoa iteene misiritaãkapeka. Uatxa ixipope ninoa misiritiko. Soti auĩte makatxakapekari imaerekanina. Ininiã imãkana soti auĩte arẽkaã arokakori atoko itxauana. Uatxa kasarori imãkana, kotxi itxiko !uari. Soti auĩte makatxakapekari kãkiti maerekani ipĩkasaaki, ininiã mãkatxi kasarori atoko itxa ninoa ãkixinire.

¹⁵—Ininiã ninoa aua Teoso topanere apisatoõ. Imisãkiretiko aikoti ãki iparĩkauatana Teoso ĩkapani ikiniõtika pokamara, ĩkanõka

pakini. Ininiã iua auítetxi topanere nopini topãkakari auapikako ninoa sauaki. ¹⁶Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷Kotxi soti auíte auítetxi topanereãtaã auakari nĩkatanako ninoa. Iua anikana ninoa sõtoãrimoni. Iuaã auakari sõtoãri iãtakani ãtipirika auapikako. Teoso makatxakariko ikinika iãtsaãna. !Itxiapataikana.

Imapotõkire Popitari Makatxakiko

8 ¹Imapotõkire popitari imakatxakasaaki, ikinipoko tsorĩkaxitita Teoso tixineẽ. Ikara atoko ipixini oara. ²Eereka natamatana setxi Teoso nitiriakori, iua apisatoõ timakani. Isikaãkana setxi xikari kamiko trõpeta inakori.

³Eereka ãti Teoso nitiri apoka. Itima Teosomoni sikakori takikoãtaã. Kamariãro arikiko koanati oro kamakori iuamoni aua. Kamariãro ito sikaãka iuamoni, Teosomoni isikini ĩkapani, ikinika Teoso nakitiakori amanaãkiti sãkiretxitikata. Ininiã arikari iua kamariãro Teosomoni sikakori takikoãtaã nopini. Oro kamakori iua Teosomoni sikakori takikoãtaã auítetxi topanere apisatoõ. ⁴Ininiã iuakoã kamariãro txiã, Teoso nakitiakori amanaãkiti sãkiretxitikata kanĩka Teoso apisatoõ. ⁵Ininiã eereka iua Teoso nitiri kosekari okoana. Ixãpokakari xaminaminiki mẽkorĩkakariã, Teosomoni sikakori takikoãtaã nopini auakariã. Eereka okari itiximoni. Iuasaakipeka aua karokirauari, mẽkokari pakini. Apaka iusaaki itixi iakeẽkata.

Koatro Trõpeta Pirena

⁶Ininiã ninoa setxi Teoso nitiriakori setxi trõpeta auakini iposope itrõpetane ixõkinina ĩkapani.

⁷Ininiã ninoa Teoso nitiriakori ãti xikarauata itrõpetaneẽ. Iusaaki katxĩkareri kai soro atoko inakari, apaka xaminaminiki mẽkorĩkakari arẽkatxiã koketakori okaãka itiximoni. Ikara xika apanakini aamina itixi auakari arika, ininiã ipi ãti pakini aamina auiniãtaã ãtika arikaãka. Ikinika katsotati arika apaka.

⁸Eereka ãti Teoso nitiri xikarauata itrõpetaneẽ. Ininiã ixirata auíte atoko inakari arikatxikata okaãka potxoari uinitimoni. Ininiã ipixini potxoari uiniti arẽkatxi itxapekaua. ⁹Ininiã apanakini potxoari uiniti ãki auakani ipĩpe, ininiã ipi ãti pakini potxoari uiniti auakani auiniãtaã ãtika ipĩpe. Iusaaki apanakini maporoni apaka xipokaãka, ininiã ipi ãti maporo auiniãtaã ãtoka xipokaãka.

¹⁰Eereka āti Teoso nitiri xikarauata itrōpetaneē, ininiā ipi āti pakini initiriakori xikarauatape. Iuasaaki iōriki mitari iaxitikero katxaākata. Otirika tirikapi atoko. Oīrika ipixini uini nopini. Oīrika ipixini sōtoāri nopini apaka. ¹¹Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹²Ininiā āti Teoso nitiri xikarauata itrōpetaneē, ininiā ipi ipi pakini initiriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi !iponikaika. Iua atokotxikana !kanōka ipi ipi pakini oara kasiri, iōriki pakini !iponikaika.

¹³Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itapasākireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpeta Teoso nitiriakori xōkini !kapani.

Āti Trōpeta Xōkiko

9 ¹Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore !kapani. ²Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³Iposo atoko txītxiri atoko inakari pokīka itxiā. Posotiiretxi isiākana, ininiā kaxipiro itixi auakari posotiire atoko aua txītxirimoni, kākiti ioākini !kapani. ⁴Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. ⁵Kona isikaākana posotiiretxi kākiti okinina !kapani. Sīko kasiritinanira ninoa paniātaāka imisiritinina ninoa. Imisiritarina kaxipiro ioākini atoko. ⁶Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

⁷Iua txītxiri kavaro atoko itxana. Kavaro neenamatchi kamakani atoko itxana. Ikiiāna aua saporīēta atoko oro kamakori. Itoōna kākiti toō atoko itxana. ⁸Ninoa iāko sito iāko atoko itxana. Itsiriina ākiti tsiriī atoko itxana. ⁹Itorota ipatinina koana metao kamakori atoko. Imīkitana ene kavaro itomaneri miteēkani ene atoko. Mitekaī ene atoko itxana. ¹⁰Ninoa xipi kaxipiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. ¹¹Ninoa

auíte aua. Iua Satanasi nitiri. Mitxi aariko mamapotōkire irikoti āki auakari iua. Xoteo sākireē iua uāka Apatō itxaua. Kreko sākireē iua uāka Aporioō itxaua. Popīkari sākireē “Ikinipoko Xipokakari,” itxaua.

¹²Āti misirikaretxi napapeka. Txama auapanikako apikomoni ipi misirikaretxi.

Āti Trōpeta Xōkiko

¹³Āti Teoso nitiri xikarauata itrōpetaneē. Iuasaaki seisi trōpeta xōkapeēkaika. Teosomoni sikakori takikoātaā oro kamakori aua ipi ipi pakini iko. Ikara Teoso apisatoō. Nikenakotari iko takote auakari sākirauatini. ¹⁴Ininiā iua txari Teoso nitiri iua trōpetaā xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵Naia ipi, ipi pakini Teoso nitiriakori iposopekana ia anokanani, ia kasiriti, ia ōti, ia oara manapi ĩkapani. Ininiā ninoa sikakaāka kaiāopokori kākiti okinina ĩkapani. Ininiā ipi āti pakini kākiti auiniātaā auiritaāka ātika okinina. ¹⁶Āti sāpiretano ninoa sotatone kavaro nopini auakani tosētosi mirāo aua. Kaiāopokori.

¹⁷Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakari ēxōpiri atoko. Ikiina ākiti kii atoko. Inamaāna ipokīka xamina tirika, katxiāri, ēxōpiri pakini. ¹⁸Ikara xamina tirinakari, ikara katxiāri, ikara ēxōpiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika. ¹⁹Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

²⁰Ininiā itomane kākiti koriā ia misirikari xika. Iuaritika kākiti mokakoni maerekati kamakani !nirekari itakanapinirina imaerekani. Ninoa kapotoreēkapanikaua Satanasi nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. ²¹Ninoa kākiti okapanikari apanakini. Ikamapanikarina miīti parīka. Isirīkapanikana apanakinikata. Iitirīkapanikarina apanakini kākiti tii. Kona inirekarina maerekati itakanapinina.

Aätsopa Axapitiri Iapirikakori

10 ¹Iuasaaki natamatari Teoso nitiri iaxitikiri katxakini ïkorapokoritimoni. Kataparari iua. Iua katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aätsota tirinakari atoko itxa. ²Imaïkanãtari aätsopa iapirikakori axapitiri. Iuakoã aätsopa ikatamëka. Itakari ikiti ikikomonikiri potxoari uiniti nopini. Isanaremonikiri ikiti itakari imiriï. ³Akiripoakata ãkiti atoko. Iuasaaki setxi iokaamori kenakotaãka. ⁴Iuasaaki niõkatsopaaritari ninoa setxi iokaamori sãkire. Txamari nikenakotari ãti iaxitikiri sãkire. Itxano:
—Kona piõkatsopatapiri ninoa setxi iokaamori sãkire —itxa iaxitikiri.

Aätsopa Axapitiri Nikiko

⁵Iuasaaki Teoso nitiri aua ãti ikiti imiriï. Potxoari uiniti nopini ãti ikiti aua. Iua õtanõkari iuako iaxiti. ⁶Iuasaaki itxa:
—Uatxa nisãpiretakiti Teoso ãtipirika auakari sãkire. Ikamari ikinika iaxiti, iaxiti auakani pakini. Ikamari ikinika ïkorapokoriti, ïkorapokoriti auakani pakini. Ikamari potxoari uiniti, ikinika iua ãki auakani pakini. Teoso misiritinina maerekati kamakani lokananiikari apokini. ⁷Apikomoni ãti trõpeta xikarauatapanika. Iuasaaki kitxakapirïka Teoso kipatakiti oerekaãkako. Teoso sãpiretakiti initiriakori ïkorapokoritimoni, isãkire sãpiretakanimoni païtiki oerekaãkako —itxa Teoso nitiri.

⁸Eereka iuaïkana nikenakotari iaxitikiri sãkirauatini:

—Pisa. Papariko aätsopa iapirikakori, Teoso nitiri uakoã auakari. Iua ãti ikiti imiriï, ãti ikiti potxoari uiniti pakini aua kititakari.

⁹Ininiã nisa iuamoni, ininiã nitxari iua:

—Pisikano ere aätsopa iapirikakari.

Iuasaaki itxano:

—Papakapariko, nika pitxari ia aätsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako — itxano nota.

¹⁰Ininiã nimaïkari ïkora aätsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aätsopa ninikakiti.

¹¹Iposo atoko isãpiretano:

—Iuaïkana pisãpiretariko apikomoni Teoso sãkire, kaiãopokori kãkitimoni, kaiãopokori ãti uãkamoni, kaiãopokori ãti uãka

sãkire sãkiretakanimoni, kaiãopokori auĩtetxiakorimoni pakini pisãpiretariko nisãkire —itxano.

Ipi Teoso Sãkire Sãpiretakani

11 ¹Aãke niaõrauatini ãkapani nisikaãka. Iuasaaki Teoso nitiri txano:

—Pisa. Piaõtariko Teoso misãkiretiko aikoti. Piaõtariko Teosomoni sikakori takikoãtaã. Piaõtana Teoso misãkiretakani iuaã auakani. ²Kona piaõtapiri Teoso misãkiretiko aikoti pirikere, kotxi Xoteo minakaniua apotiitiniãtaãua iuaã. Iuaã ninoa ãkapani. Ninoa misiritariko Teoso sitatxine koarëta toisi kasiriti. Ikara Teoso sitatxine, Xerosareẽ inakori. ³Nisikaposotiiiretanako ipi kiki. Teoso sãkire sãpiretakani ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiã mio tosëtosi sesëta õti pakini ninoa sãpiretariko nisãkire.

⁴Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani auĩte apisatoõ, Teoso apisatoõ ninoa aua. ⁵Kãkiti nirekasaakiri imisiritinina ninoa, iuasaaki xamina tirinakari pokĩka inamaãna. Ininiã iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶Teoso sãkire isãpiretakasaakina, iposotarina iaxiti itotini. Ininiã iuasaaki ãparaã kona ikipaika ãkorapokoriti. Ninoa posotari ãparaã arëkatxi inĩkitakini. Iposotarina itxĩkitakiniri ikini sereti maerekati apokini ãkorapokoriti auakanimoni. Inirekasaakina, ninoa posotari ikara ikinika ikaminina.

⁷Teoso sãkire isãpiretinina xipoka atoko, monõkori aariko mamapotõkire irikoti ãki potoriãkari pokĩka. Iuasaaki iua kamari neenamatzxi ninoa ipi Teoso sãkire sãpiretakanikata. Eereka iua okapena ninoa. ⁸Ininiã ninoa ãto sirĩkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ãpiriãmitakari nopini. Iua sitatzxi akiriuãkãtaãka Sotoma, Exito pakini, kotxi Sotoma, Exito pakini atoko itxa Xerosareẽ. ⁹Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ãto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona. ¹⁰Ininiã ikini kãkiti atamatariko ninoa koriãkani ãto. Ininiãkara ikinimane enenĩkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ãkapani. Ninoa kamariko ikara atoko inakari, kotxi

ninoamoni naia ipi Teoso sãkire sãpiretakani misiritana ninoa. Ininiã ninoa eneniã, kotxi Teoso sãkire sãpiretakani koriãpeka.

¹¹Iuaritika ipi õti, ãti õti, ipixini õti pakini napaka atoko, Teoso txikitakana ninoa iuaĩkana auãki ininina ĩkapani. Ōkitakauana. Iuasaaki kãkiti atamatana, ininiã ipĩkarauatana. ¹²Ikara eereka ninoa ipi Teoso sãkire sãpiretakani kenakotari iaxitikiri sãkirauatini: —Uaimoni hina.

Ininiã ninoa kanĩka katxiãriã Teoso tixinemoni. Ninoa mokaiakariakori itikana ninoa kanĩkaãpotini Teoso tixinemoni. ¹³Iuasaakipeka itixi iteene iakeẽkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iuasaaki setxi mio kãkiti ipina. Kãkiti auapanika inakani pĩkarauata. Iuasaaki itxana: —Teoso iaxiti auakari apiatakari itxaua —itxana.

¹⁴Īkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paĩtiki ãti misirikaretxi apiari apokapanikako.

Trõpeta Imapotõkirekiri Xõkiko

¹⁵Iuasaaki Teoso nitiri mapotõkirekiri xikarauata itrõpetaneẽ. Itomane iaxiti auakani iteene akiritari:

—Ikini itixiti auakani auĩte itxapekaua aãuĩte Teoso, Kristo pakini. ãtipirika iua ikinimane auĩte itxauako —itxana.

¹⁶Iuasaaki vĩtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

¹⁷“Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirĩka aua. Katana ãtipirika pauapika. Erekapitikai, kotxi kaposotiirei, ininiã ãtipirika ate auĩte pitxaua.

¹⁸Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa apokapeka ipĩkani misiritiko mereĩko õti. Pinitiriakori, pisãkire sãpiretakani, apaka pinakitiakori pite paxitakani pakini ĩkitxitiko õti apokapeka. Ikinimane kãkiti poiãorini, kãkiti kaposotiirerini pakini apakapariko ikamakitina ĩki. Iuasaaki pixipokariko ĩkorapokoriti xipokakani,” itxana.

¹⁹Eereka natamatari iuaã Teoso tixineẽ imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iuasaaki natamatari ito mẽkokari. Nikenakotari ito

okaratxirari, ito iokaamori pakini. Itixi iakeēkata. Ito āparaā kai soro katxīkareri atoko katxaka.

Imini Mitapoari, Sito Pakini

12 ¹Eereka nitaponeē nitikoka. “Kipa atxiīti?” nitxa nākixinireē. “Natokopa itxa Teoso oerekiniri kākiti?” Kotxi sito tokiā Teoso tixine. Atokatxi iotximere iakirokaro oa omāka atoko inakari. Kasiri aua okiti patapi. Okiiā aua auītetxi saporietane, tosi iōriki kamakori. ²Oa kamixiro. Oa akiripoakata oātatsiirauatini xika, kotxi kaiamapeka amarini oāuākitakini.

³Eereka iuaīkana nitikoka, kotxi imini mitapoari tokiā Teoso tixineē. Pōkamarari. Iua setxi ikii aua. Aua tesi iko. Ikininape ikii aua auītetxi saporietane. ⁴Ixipiā ikosekari kaiāopokori iōriki iaxitikero, uai ixiti oka itxaro iōriki. Itima oa sito apisatoō, kotxi paītiki amarini oāuākitaka. Inirekari iixirākiniri amarini, amarini auakasaaki. ⁵Eereka oa sito auākitakari amarini, kiki. Oa sito ākiri aneēkasaaki ikini itixiti auakani auīte itxauako. Auītetxi kataparari itxauako iua amarini. Auakasaaki, imini lixirākari amarini. Patimari maīkiko iua amarini. Teoso auinimoni anikaāka amarini. Iuaātaā Teoso topākanāta auītetxi itopanere nopini. ⁶Oa sito miteka āparaā makipakaniātaā. Teoso oerekatapekari iuaā okaikotini īkapani. Iuaā oinīkataākako mio tosētosi sesēta ōti. Ipi anokanani, āti anokanani ipixini pakini itxa.

⁷Eereka aua neenamati Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸Teoso nitiriakori tapara apiata, ininiā imini initiriakorikata !auritaākaika Teoso tixine ikaikotinina. ⁹Iua imini mitapoari iokanataāka maparamoni. Iua imini kitxakapirīkaripekara. Iua Txiapo inakori. Iua Satanasi inakori. Iua misirienetari kākiti ikini itixiti auakani. Maparamoni iokanatikosaaki, iua, initiriakori pakini okaākana uai īkorapokoritimoni.

¹⁰Eereka nikenakotari Teoso tixinekiri sākire kataparakieneri: —Kākiti maerekani makatxakiko apokapeka uatxa. Teoso makatxakari kākiti maerekani. Uatxa Kristo posotiire oerekaāka. Uatxa oerekari ikinimane auīte ininiua. Teoso mereēkiti ikinimane auīte itxaua uatxa, kotxi aītariakori kamapiretakari iokanatapeēkaika mapara. !Ikaikotaika Teoso tixine. Mitxi ikamapiretari aītariakori Teoso apisatoō. Pokamara, īkanōka ikamapiretana. ¹¹Aītariakori iokanatapekari Satanasi isini. Ninoa posotari iokanatiniri Satanasi,

kotxi Teoso Soti Auítene ipina ninoa íkapani. Iarêka xiketa ninoa íkapani. Ninoa posotari Satanasi iokanatinina, kotxi ninoa sãpiretari atão inakari Teoso sãkire. Ninoa iposope okikona Teoso íkapani. ¹²Híte Teoso tixine auakani hîpoxokoniatako. Txamari híte itixi auakani, potxoari uiniti auakani, erepaniko, kotxi Satanasi apopeka ereê híte sauaki. Iua iteene naiataua, kotxi imarotari paítiki Teoso !auritaikari iua maerekati apikomoni ikamini —itxa iua Teoso tixinekiri sãpirena.

¹³Uai itiximoni okikosaaki, imini mitapoari asikatikinitaro oa sito amarini auãkitakakaro okiniro íkapani. ¹⁴Oa osikaãka ipi mîkitatxi kokoi mitari mîkita, oãraini íkapani. Oa araã âparaã makipakanimoni. Teoso oerekinimoni osa. Iuaã Teoso nîkataro oa ipi anokanani, âti anokanani, ipixini pakini. Iuaã imini mitapoari !iposotari oamoni apokini. ¹⁵Oa araãkasaaki, imini mitapoari koporikaãtari âparaã inamaãkiri oa tikini. Uini atoko itxíkitakari âparaã, oa sito axãpoãtini íkapani. ¹⁶Kipatxi !auritari âparaã sini oamoni. Ixoreka. Ixorekasaaki, ikinika âparaã imini namaãkiri kipatxi âki isa. ¹⁷Ininiã imini iteene omanataro oa sito. Ininiã asikatikinitana apanakini oa anaakori inaiatinina íkapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auíãkani oa anaakori itxauana.

Monõkori Potxoari Uiniti Pokíkaãtakari

13 ¹Ininiã nitaponeê nitima ikipatxite nopini. Iuaã nitikari monõkori potxoari uiniti pokíkaãtini, kaníkiita itxa. Iuamoni auari iko tesi pakini. Apaka ikii setxi aua. Ikinika iko aua auítetxi saporietane. Ikini ikii aua uãkatxi Teoso misãkirepiretakari. ²Iua monõkori nitikakiti ákiti kaiõkari atoko itxa iito. Ikiti oso kiti atoko itxa. Inama ákiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auítetxi itxaua. Imini auítetxi ininiua atoko itxa. Imini txíkitakari iua potxoari uinitikiri sãkire kaposotiire inini, isãkire kãkiti auikini íkapani. ³Nota atamatarikiini. Ikii âti ipípe ikaro mitari xika. Eereka ikaro tximõka. Iuaãkana auãki itxa ikii ipinakari. Kãkiti ikini itixitikini atamatakasaakiri, itsoríkaãtana. Ininiã auikarina isãkire. Ikamarina iua nireêkiti. ⁴Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire: —Âti kaposotiireri potxoari uiniti pokíkaãtakari atoko inakari !auari. Kãkiti !iposotari inaiatiniri iua —itxana.

⁵Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auítetxi ininiua koarêta toisi pakini kasiriti. ⁶Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. ⁷Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auíte ininiua, ikini itixiti auakani auíte ininiua, ikini kãkiti sãkire sãkiretakani auíte ininiua. Ikinimane auítetari iua maerekati kamakari. ⁸Ikini itixiti auakani, Teoso nakitiakori minakanuia, auikariko iua potxoari uiniti pokĩkaãtakari sãkire, kotxi iteasonetarina iua. Itixi kamiko apisapanika ninoa uãka liõkataãka Soti Auíte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

⁹Hĩte, ia atatsopatakani kakenakokii, ininiã hĩkenakotariko nisãkire. ¹⁰Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakanuia himĩteenekariko himisiritiko. Kona hĩtakanapapiri Teoso kimapore. Ātipirika hĩkamariko Teoso nirekakiti.

Monõkori Itixiãkiri

¹¹Eereka nota itikari ãti monõkori. Itixiã ipokĩka. Aua ipi iko. Soti auíte ãkiri iko atoko itxa, iuaritika isãkirauata imini sãkire atokokana. ¹²Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³Iua itixiã pokĩkakari kamari posotiiretxi mitxi mimarotakoti. Ipaniãtari xamina tirinakari iaxiti auakari ĩkorapokoriti apokini ikinimane amatiniri ĩkapani. ¹⁴Iua potxoari uinitikiri auiritari itixiãkiri kaminiri posotiiretxi iua ĩkapani. Posotiiretxi xika itixiãkiri misirienetari ikinimane itixiã auakani. Itxĩkitakari kãkiti kaminiri potxoari uinitikiri ĩto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaĩkana auapanika ikii. ¹⁵Itixiã pokĩkakari auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretinuia, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶Itixiã pokĩkakari paniãtari ikinimane kãkiti apakapiniri

Satanasi takaõtxikare iuakoãna ikikomoni, minakaniã iteẽtaãna. Ipaniãtari ikinimane kãkiti auĩtetxi inakanuia, auĩtetxi minakanuia, katiini, matiini, nitiritxi, nitiritxi minakanuia pakini, apakapiniri Satanasi takaõtxikare. ¹⁷Kãkiti iua takaõtxikari mauakiniti !auritaãka iamotiitinina. !Auritaãkana ivẽtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸Kimarore hĩtxako, ikara himarotini ĩkapani. Kimarore hininiã himarotari potxoari uinitikiri nomerone kiki uãka itxa. Nómero 666.

Soti Auĩte Sẽto Koarẽta Koatro Mio Kãkitikata

14 ¹Eereka nionakaãta nitaponeẽ. Natamatari Soti Auĩte. Õtanoxiratarari nopini auanãta. Ixirata uãka Sião inaãka. Kãkiti sẽto koarẽta koatro mio pakini aua iuakata. Kaiãopokori kãkiti. Iteẽtaãna Soti Auĩte iri uãka iõkatsopatapeẽkaika. ²Eereka nikenakotari ninoa xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³Ninoa kãkiti sẽto koarẽta koatro mio pakini tima auĩtetxi topanere apisatoõ, okĩtxinoka xãpokaĩtotakini ipi ipi pakini apisatoõ. Totiakori vĩtxi koatro pakini apisatoõ apaka itimana. Ninoa sẽto koarẽta koatro mio xikaretari xikari amaneri. Apanakini !imaĩkari iua xikari amaneri. Ninoa sẽto koarẽta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. ⁴Ninoa kiki !isirĩkana sitokata. !Auiritarina iĩtona kaminiri maerekati. Soti Auĩte sinimoni ninoa apaka sa. ĩkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auĩtene pakinimoni. ⁵!Ikamarina maxikatĩka isãkirena. Atão inakarinoka isãpiretana. !Ikerokarina isãkirena Teoso iauĩtena apisatoõ.

Ipi Āti Pakini Teoso Nitiri Sãkire

⁶Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷Itapasãkireritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti.

Híteosonetariko Teoso, kotxi iua kamari iaxiti, ìkoraxiti, potxoari uiniti, sōtoāri pakini —itxa iua Teoso nitiri araākari sākire.

⁸Iua sākirauataka atoko, āti Teoso nitiri txari:

—Papirónia sitatxiti xipokapeka. Iuaã auakani kaposotiirerini, iuaritika ixipokapena. Papirónia sitatxiti auakani paniātari imakinika itixi auakani maerekati ikaminina, maerekati ìtotxi nireēkiti. Ininiã ninoa kamari maerekati Papirónia auakani paniātakiti.

⁹Ninoa Teoso nitiriakori ipi sākirauataka atoko, āti Teoso nitiri txari itaparasākireritika:

—Teoso misiritanako kākiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kākiti Satanasi takaōtxikare iteētaāna takakani, iuakoāna takakani. ¹⁰Kākiti iua atoko inakani misiritaākako, kotxi Teoso iteene omanākarauata maerekati ninoa kamakiti xika. Teoso misiritanako ninoa, ininiã atatsiirauatana xamina tirinakariã. Ēxópiri arikanako ninoa. Teoso nitiriakori erekarini, itixine auakani, Teoso Soti Auĩtene pakini itikariko ikara kākiti misiritiko. ¹¹Iua xamina txĩkitakari kākiti atatsiirauatini. Iua xamina tirinapikako. !Ixipoka. Itirinapika. Itxiākapika. Ninoa misiritiko !iotoka. Pokamara, ìkanōka auapika ninoa misiritiko. Kākiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuaãka iĩtoāna auaitotakini misiritaākako ikara atoko —itxa iua Teoso nitiri sākire.

¹²Ininiã hĩte Teoso nakitiakori, hĩte ipaniātakiti kĩpitakani, hĩte Xesosi nireēkiti ātipirika kamakani, kataparaxinire hĩtxako. Himĩteenekariko kākiti misiritinii.

¹³Eereka nikenakotari Teoso tixine auakari sākire. Itxano:

—Nisāpiretakiti piókatsopata. Kākiti ipĩkasaaki Apiananiri ìkapani iparĩkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasāpaniri Teoso parĩka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴Eereka nitaponeē nionakaāta iaxiti. Iuasaaki natamatari katxiāri kasarori iuaã. Aĩtari iaxitikiri atoko inakari topāka iua katxiāri nopini. Ikiiã aua auĩtetxi saporietane oro kamakori. Iuakoã saasara atoião aua. Pauanaro. ¹⁵Iposo atoko āti Teoso nitiri pokĩka Teoso aapoko. Iua itaparasākireritika akiritari iua katxiāri nopini topākakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶Ininiã iua katxiãri nopini topãkakarí isaasarateẽ isauakari ikini itixiti nopini auakari. Amari takari imakinika.

¹⁷Iposo atoko nitikari ãti Teoso nitiri pokĩka Teoso aapoko Teoso tixineẽ. Iuamoni apaka aua saasara ãtoĩão iuakoã. Pauanaro.

¹⁸Iuaĩkana ãti Teoso nitiri apoka. Teosomoni sikakori takikoãtaã ipotorika iua. Inĩkatari xamina tirinakari iuaã. Iua itaparásãkíreritika akiritari Teoso nitiri saasara auakiti:

—Pimaĩkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. ²⁰Ova ori kãkiti kitiã iopetikoãtaã sitatxi mapotõkire. Txamari na ovapeñi ikara atoko itxa. Arẽkatxiãra ikara atoko itxa. Iua arẽkatxi uini panaã atoko itxa. Tresẽtosi kirómetro arẽkatxi aua. Arẽkatxi ãpanaã kavaro namaãpeka apoka arẽkatxi. ãti metro ipixini ãpanaã arẽkatxi.

Teoso Misirikare Mĩkani Setxi

15 ¹Eereka nitaponeẽ nitikoka iuaĩkana.

—Kipa atxiĩti? —nitxa iuaĩkana nãkixinireẽ, kotxi natamatari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

²Eereka natamatari ipoa atoko inakari. ãtakaãri, xamina tirinakarikata koketakori atoko itxa ipoa. Kãkiti tima ipoa ãtinikata. Ninoa iokanatapekari Satanasi sini, kotxi !ikamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti !ikamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti.

³Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auĩtene xikare. Ia ixikaretana. Itxana:

“Teoso Apiananiri, ikini posotiiretxi auakitii pite. Peerekari piparĩka. Pite kaposotiireri. Pite atãonani pikamakiti. Ikini uãkati auĩte pitxaua pite.

⁴Ikinimane paxitaiko pite ipĩkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵Eereka natamatari Teoso aapoko ãki. Natamatari iua auuniãtaã. ⁶Iposo atoko ninoa Teoso nitiriakori setxi, misirikaretxi setxi mĩkani, pokĩka Teoso aapoko. Ninoa mãka katsopiri, pomẽkoriri. Ninoamoni aua oro kamakori. Itinimaĩ nopini inapa. ⁷Ninoa ipi ipi pakini okĩtxinoka xãpokaĩtotakini iuaã aua. Okĩtxinoka xãpokaĩtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸Teoso iotximere xãpoka iua aapoko ãki. Katxiãri kasarori atoko itxa. Iuasaaki kãkiti !auritaãka Teoso aapoko ãroini, ninoa Teoso nitiriakori, misirikaretxi mĩkani setxi pakini, misiritakasaakina kãkiti.

Iãtatxi Teoso Omanãkare Auakiti

16 ¹Eereka nikenakotari Teoso aapoko ãki auakari sãkire. Itaparakieneritika imisãkiretana ninoa Teoso nitiriakori setxi. Itxana:

—Hĩsa. Hĩkitakari Teoso omanãkare iãtatxi ãki auakari itixi auakanimoni —itxa.

²Ininiã ninoa Teoso nitiriakori sari. Merepanika ãtika initiri kitakari iãtatxi ãkikiri itixi auakanimoni. Iuasaaki kimiti mitari, katsiiri, apoka kãkiti Satanasi takaõtxikare auakini ãtomon. Potxoari uinitikiri atoko inakari kai kamakori teosonetakani ãtomon apoka ikara atoko inakari amianari.

Ãti Iãtatxi

³Iposo atoko ãtipekana Teoso nitiri kitakari iãtatxi ãkikiri potxoari uunitimoni. Iuasaaki ãparaã arẽkatxi itxapekaua. Kãkiti ipĩkari arẽka atoko itxa iuasaaki. Ininiã ikinipoko potxoari uuniti auakani iuasaaki xipoka.

Ãti Iãtatxi

⁴Iposo atoko ãtipekana Teoso nitiri kitakari iãtatxi ãkikiri uinimoni, sãtoãri pakinimoni. Iuasaaki ãparaã arẽkatxinoka itxapekaua. ⁵Iuasaaki nikenakotari Teoso nitiri ãparaã ñikatakari sãkire. Itxari Teosomoni:

—Pite maerekati makamakatii. ãtipirika auakarii pite. Atão pikamakiti pimisiritinina maerekati kamakani ñkora atoko. ⁶Kotxi ninoa okari kãkiti pite nakitiakori. Okarina pisãkire sãpiretakani. Ninoa oxiketari ninoa arẽka. Ininiã uatxa pite sikana arẽkatxi iãtinina. Atão imisiritikona kotxi maerekati ikamana —itxa Teoso nitiri.

⁷Iposo atoko nikenakotari ãti sãkire. Teosomoni sikakori takikoãtaã auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakarinoka pikama —itxa.

Ãti Iãtatxi

⁸Eereka ãtipekana Teoso nitiri kitakari iãtatxi ãkikiri atokatximoni. Iuasaaki atokatxi apiata patakata. Auiritaãka kãkiti arikini itaparapatakaã. ⁹Ininiã kãkiti arikaãka atokatxi patakaã. Iuaritika ñinirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenã akiritari Teoso uãka.

Ãti Iãtatxi

¹⁰Ininiã ipi ipi pakini Teoso nitiriakori kitakapekari iãtatxi ãkikiri itiximoni. Eereka iuaãkana ãti Teoso nitiri kitakari iãtatxi ãkikiri auãtetxi topaneremoni iua potxoari uiniti pokãkaãtakari topaneremoni. Iuasaakipeka iua potxoari uinitikiri auãtetxi ininiãtaãua patimari ipiãkini. Kãkiti iuaãtaã auakani akatsaninitaua itsii xika. ¹¹Iuaritika ñinirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Ãti Iãtatxi

¹²Eereka iuaãkana Teoso nitiri ãti kitakari iãtatxi ãkikiri mitari uinitimoni Eoparatxi inakorimoni. Iuasaaki uini auaã. Isonãka. Kimapori itxaua, auãtetxiakori atokatxi pokãkinimoni ñkani inapinina ñkapani. ¹³Iposo atoko nitikari maerekani matamatakoni

ipi āti pakini. Atiniro atoko itxana. Āto pokīka mitapoari imini namaā. Āto pokīka iua potxoari uiniti pokīkaātakari namaā. Āto pokīka iua itixi pokīkakari namaā. Iua itixi pokīkakari iua Satanasi sākire sāpiretakari itxaua. Na atāoene isākire. Poxirari ikama. ¹⁴Ninoa maerekani matamatakoni ipi āti pakini Satanasi nitiriakori. Ninoa kamari posotiiretxi. Isana auītetxiakorimoni, ikini itixiti auakanimoni. Akiritana kākiti apotiitiniua ineenamauatinina īkapani. Teoso kaposotiireri naiatanako ninoa itixi xipokini ōtisaaki.

¹⁵Hīte ia atatsopatakani, Apiananiri txai hīte:

—Erepaniko. Napokako kiītiriri apokini atoko, kākiti mimarotakinitipanika. Napokasaaki ereē, pikoatiniā, kamāka pininiā, pipoxokoniua. Ikara atoko pininiā, kona kasarai ikinimane apisatoō pisini, ininiā kona kapētai —itxa Apiananiri sākire.

¹⁶Eereka ninoa ipi āti pakini Satanasi nitiriakori maerekani matamatakoni, apotiitari auītetxiakori Amaketō inakoriātaā. Iuaātaā akiritaāka Amaketō Xoteo sākireē.

Imapotōkire Iātatxi

¹⁷Ninoa setxi Teoso nitiriakori, seisi kitakapekari iātatxi ākikiri. Ātinoka !ikitakapanikari. Iuasaakiika iua kitakari iātatxi ākikiri ītimamoni. Iuasaaki nikenakotari auītetxi itopanereātaā auakari sākire: —Ixipokapeka —itxa itaparakieneritika.

¹⁸Iposo atoko iotxira mēkoākata. Ikarokirauata. Pataparaeneri. Itixi iakeēkata. Mitxi !auari itixi iakeēkatini īkora atoko inakari. Iuasaakiikarako apiatako. ¹⁹Iua sitatxi apiari Papirónia inakori xoreka. Ipikata ixoreka, ininiā ipi āti pakini sitatxiti atoko itxaua. Ikini itixiti auakari sitatxi xipokaāka iuasaaki. Teoso limaxinīkaretari Papirónia sitatxiti auakani kamakiti, ininiā iteene imisiritana ninoa, kotxi iteene omanākarauata imaerekanina xika. ²⁰Iuasaaki ikini ipokomiriī !auaika. Ōtanoxiratari ikinipoko xipoka iuasaaki. ²¹Katxīkareri iaxiti auakari, kai mitari atoko inakari, katxaka itiximoni. Apanakini kai minani koarēta sīko kiro. Iua irika kākiti nopini. Ikara katxakakari pamonōkonipaniri. Iua xika kākiti iteene misākirepiretari Teoso.

Sito Potxoari Uunitikiri Nopini Topākakaro

17 ¹Ninoa Teoso nitiriakori setxi pakini iātatxi setxi auakini, seisi kaikota. Ātika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topākanāta uini itori nopini. Iuaā auakani misiritiko noerekaiko pite. ²Auñtetxiakori ikini itixiti auakani kamari maerekati iua sitatxiti auakanikata isirīkinina. Iua sitatxi auakani txīkitakari kākiti ikini itixiti auakani maerekati ikaminina. Kapoāroā poātakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaā makipakaniātaā. Iuaā natamataro sito topākanāta iua potxoari uinitikiri nopini. Pōkamarāñtori iua. Iitoā aua iōkatakori kaiāopokori Teoso imisākirepiretini iōka. Ikii setxi aua. Iko tesi aua. ⁴Oa sito māka pomamari ipixini. Pōkamarari itxa omāka. Pakaroneri omāka. Oitoā aua oro, pérora, kai soro pomēkoriri pakini aua. Omaikari iākoanatxi oro kamakori. Iua iākoanatxi āki aua maerekati okamakiti itxiko atoko inakari. Maerekati oīto kamakiti ikara atoko itxa. ⁵Oteētaā aua sākiretxi iōkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” ⁶Nitikaro oa sito opoātini, Teoso nakitiakori arēka oātini xika. Xesosi sākire auikinina xika, okaākana. Natamatakasaakiro nitikoka.

—Kipa atxiīti? —nitxa.

⁷Iua Teoso nitiri txano:

—Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari.

⁸Iua potxoari uinitikiri patamatakiti mitxi aua, txamari uatxa !lauhaua. Iua eereka ipokīkapanikako aariko mamapotōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopaā iōkauākatakoniinoka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !lauhaua, eereka iuaīkana auākipeka itxa.

⁹—Ikara inakari pimarotini ikapani, iteene pimixinikariko. Kinirepa ikii setxi aua? Kotxi ōtanoxiratari setxi apaka aua. Oa sito topākanāta iua ōtanoxiratari nopini. ¹⁰Kinirepa ikii setxi aua? Kotxi auñtetxiakori setxi apaka auako. Auñtetxi !itxaikauana ninoa sīko. Ātinoka auñtetxi txapanikaua. Āti kona apokapanika. Iua apokasaaki mapaōtinoka

auítetxi itxauako. ¹¹Iua potxoari uinitikiri mitxi auãki inakari, iposo atoko !auaika inakari, iua apokako. Iuara auítetxi txauako. Iua mitxi apotiitaua ninoa setxi auítetxiakorikata. Áti õti iua xipokaãkako.

¹²—Patamatari iko tesi pakini. Kinirepa iko tesi aua?

Kotxi auítetxi tesi aua. Ninoa auítetxiakori kãkiti auíteakori !itxapanikauana. Ninoa sikaposotiiretaãkako auítetxi ininiuana iua potxoari uinitikirikata. Ninoa auítetxi itxauanako áti oaranoka. ¹³Ikininape ninoa tesi auítetxiakori parĩkauata iua potxoari uinitikiri ïkapani. Iposotiireëna, itaparaãna iparĩkauatana iua potxoari uinitikiri ïkapani. ¹⁴Inaiatarinako Teoso Soti Auítene. Teoso Soti Auítene iokanatanana ninoa isinina, kotxi iuanani Apiananiri itxaua. Auítetxiakori auíte itxaua. Átipirika iuakata sikani, iua akiritakini, imereëkini, átipirika iua nireëkiti kamakani, ninoa moianatari iua Soti Auíte ineenamauatini —itxa Teoso nitiri sãkire.

¹⁵Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini.

Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini áti uãka sãkire sãkiretakani pakini. Iua kãuaãri mitari atoko itxana. ¹⁶Iua potxoari uinitikiri, ninoa tesi auítetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinaroko omãka. Kasarapeka otxako. Oxini inikanako. Ninoa xipokaroko oa xaminaã. ¹⁷Teoso txĩkitakari Teoso nireëkiti ikaminina, kotxi ninoa auítetxiakori parĩkauata iua potxoari uinitikiri ïkapani Teoso nireëkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparĩkauatinina iua potxoari uinitikiri ïkapani. Ininiã ninoa auítetxiakori itxauana iua potxoari uinitikiri ïkapani.

¹⁸—Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auítetxiakori itixi auakani maerekati inireëkitina ikaminina.

Papirónia Sitatxiti Xipokini

18 ¹Ikara inaãka atoko nitikari áti Teoso nitiri Teoso tixine auakari katxakaãpotini ïkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ²Iua sãkirauata itaparasãkireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoa kamakiti iaõka ikaminina. Papirónia sitatxiti auakani kamari maerekati iitona nireẽkiti. Itixi auakani nirekari ikara maerekati ikaminina kapoãroã poãtakari nirekini atokokana. Auĩtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri sãkire.

⁴Eereka nikenakotari ãti Teoso tixine auakari sãkire. Itxari: “Hĩte nota nakitiakori inakani takanapariko iua sitatxi.

!Hĩkamapiri maerekati ninoakata. Ininiã !himisiritaãka ninoakata.

⁵Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶Himisiritanako ninoa. Hĩte imisiritinina atokokana, hĩte misiritana ninoa. Ipiakata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipiakata himisiritanako ninoa.

⁷Hĩtxĩkitakanako ninoa atatsiirauatinina. Hĩtxĩkitakanako ninoa maerekaxiniretinoka ininina. Ikara atoko ninoamoni hĩkaminiã, atãopitikara hĩkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa sãkire: ‘Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana ãkixinireẽna.

⁸Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sãkire.

Kākiti Txiapatini Sitatxi

Xipokini Xika

⁹Auītetxiakori ikini itixiti auakani, Papirónia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auītetxiakori txiapata iua sitatxi arikasaaki, xamina txiã itikasaakina. ¹⁰Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirónia sitatxiti !auaika. Kākiti kaposotiirerini xipokaepka. Āti oaranoka arikatxi xipokapena ninoa imaerekanina xika.

¹¹Ikini itixiti tiitxi vēxtitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

¹²Mitxi ninoa vēxtitari oro, pirata, kai soro pomēkoriri, kai soro kasarori pérora inakori. Mitxi ivēxtitarina mākatxi mata arínio inakori, mākatxi mata seta inakori, mākatxi mata pōkamarari, mākatxi mata pomamari pakini, ivēxtitana. Ivēxtitarina ikini sereti aamina eremari inakari. Ivēxtitarina ikini sereti tiitxi iko kamakori, aamina pakaroneri kamakori, pirōsi kamakori, metao kamakori, kai kamakori. ¹³Ivēxtitarina kanera, koketxi pakini. Ivēxtitarina kamariãro miha inakori. Ivēxtitarina kamariãro pirākisēsi inakori. Ivēxtitarina iãriã, aseitona iĩ, triko, triko pani pakini. Ivēxtitarina kema auĩte, soti auĩte, kavaro, mitekaĩ kavaro anikakiti pakini. Kākiti apaka ivēxtitana, nitiritxi ĩkapani. Kākiti ĩto, kākiti xinire apaka inirekana ivēxtitinina. ¹⁴Ninoa tiitxi vēxtitakani sākire sitatximoni:

—Ikinika hĩtii erekari hinireēkiti xipokaãkapeka. Ikinika hĩtxineirote !auaika. !Auaika hãpokaerekatakiti. Hĩtii arikapeka — itxana ninoa sākire.

¹⁵Ninoa tiitxi vēxtitakani katxineiroterini itxauana, kotxi kākiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vēxtitakani timanãta õtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, pōkamarari pakini. Oĩtoã aua oro, kai soro pomēkoriri.

Pérora pakini aua. Oia sito atokokana ia sitatxi. ¹⁷Áti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parĩkauatakani apaka õtakoxiti atamatarina iua sitatxi arikini.

¹⁸Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !uari —itxana ninoa.

¹⁹Iuasaaki itakarina atapani ikiiãna imatinaniuatiniãna.

Itxiapatana iuasaaki. Imatinaniuatana iuasaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiropokoni. Eereka ãti oara napaka atoko ixipokapeka ikinika —itxana isãkirena.

²⁰Hĩtepekana Teoso tixine auakanii hĩpoxokoniuatoko iua sitatxi xipokiniã. Hĩte Teoso nakitiakori hĩpoxokoniuatoko. Hĩte Xesosi moianariakorii, hĩte Teoso sãkire sãpiretakanii pakini hĩpoxokoniuatoko, kotxi Teoso arikapekari iua sitatxiã auakani hĩte imisiritinina xika.

Kai Miramaneri Potxoari

Uinitimoni Okiko

²¹Eereka ãti Teoso nitiri kataparari maĩkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isãkire.

²²Itxari iua sitatximoni:

—Xikari !ikenakotaãkaika ereẽ. !Auaika xikari viorãokata, koitxikata, trõpeta pakinikata. Ereẽ kãkiti parĩkauatini !auaika. Atarokiri kamiko ene !kakenakotikoikari. ²³Tirikapi kamara !katamatikoikari ereẽ. Taniriuatakani kiinirite ene !kakenakotikoikari. Ereẽ mitxi vëtxirauatakani apiari itxauana. Ninoa atoko inakari !uari ikini itixiti. Kãkiti ereẽ auakani misirienetana ikini kãkiti ikini itixiti auakani, kotxi ninoa sãkire maerekatinata —itxa Teoso nitiri sãkire.

²⁴Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

Areroia, Peerekari Teoso

19 ¹Eereka nikenakotari kākiti sākire, kaiāopokori kākiti Teoso tixine auakani. Itapasākireritikana itxana:
 —Areroia. Peerekari Teoso. Ate Teosone makatxakari kākiti maerekani. Kaiotximereri aTeosone. Kaposotiireri. ²Ikerokari ikamakiti, kotxi atão inakaranoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kākiti xinire ikini itixiti auakani xinire, kotxi oerekarina maerekati itotxi nireêkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sākire.

³Iuaikana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴Iuasaaki ninoa totiakori vîtxi koatro pakini, ninoa okîtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auïtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

Soti Auïte İtanorouatini Kiiniriti

⁵Eereka nikenakotari Teoso topanereẽ auakari sākire. Itxari:

—Hite Teoso nitiriakori ikini itixiti auakanii, “Peerekari aTeosone” hîtxako. Hite auïtetxi inakanii, auïtetxi minakanii apaka, hîpikiniãri Teoso, “Peerekari aTeosone,” hîtxako —itxa.

⁶Iposo atoko nikenakotari itomaneri kākiti sākire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sākire:

—Areroia, peerekari Teoso, kotxi aTeosone, Apiananiri, kaposotiireri, ikinimane auïte itxaua —itxana ninoa.

⁷—Mapoxokoniuata. Apoxokoniritika masãkirauata. Matxari: “Peerekari Teoso.” Teoso Soti Auïtene İtanorouatini iketo apokapeka. İtaniriuatakaru iua İkapani oãiamatapeka. ⁸Osikaãka mãkatxi ereri, kasarori oieretaãkiti tĭkane —itxana ninoa sākire.

Teoso nakitiakori kamakiti atão inakari oa mãka atoko itxa.

⁹Iposo atoko iua Teoso nitiri txano nota:

—Ia piõkatsopata. Iua Soti Auíte ãtanorouatini kiiniriti kemaĩtxitakoni poxokoniuaata —itxa notamoni.

Iuaĩkana itxano:

—Ia nisãpiretakiti Teoso sãkire atão itxa.

¹⁰Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹²Oki xamina tirinakari atoko itxa. Ikiiã ito auĩtetxi saporietane aua. Iuãka iõkatakori iĩtoã aua. !Kimarotikori iua uãka. Iuanoka imarotari iuãka. ¹³Arẽkatxinoka imãkaã aua. Iua akiritaãka, “Teoso Sãkire” inakori. ¹⁴Isotatoneakori, Teoso nitiriakori Teoso tixine auakani, saãpota iuakata. Iua ãkiika. Ninoa apaka topãka kavaro kasarori nopini. Imãkana peereri, kasarori. ¹⁵Iua “Teoso Sãkire” inakori namaã opokĩka iouata mitaro neenamatchi ikamini ãkapani. Kuanaro. Iua iouataneẽ okanako imokaiakarini ikini ãti uãka, ininiã ikini ãti uãka auíte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iusaaki kãkiti maerekani xika. ¹⁶Iua “Teoso Sãkire” inakori mãkaã, itapikeẽ apaka iõkataãka: “Auĩtetxiakori auíte. Apiananiri,” iõkataãka.

¹⁷Iposo atoko natamatari ãti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸—Hina. Auĩtetxiakori xini hinika. Sotatoakori auĩteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakaniua xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹Eereka nitikari iua potxoari uinitikiri. Iuakata aua itixi auakani auíteakori, isatoneakori apaka. Ninoa apotiitaua, iua kavaro kasarori nopini topākakari isatoneakorikata inaiatinina íkapani. ²⁰Iua neenamtxi xipoka atoko, iua potxoari uinitikiri maíkaãka. Isãkire sãpiretakari, atão minasãkiretakati, imaíkaãka apaka. Mítxi iua kamari posotiiretxi iua potxoari uinitikiri íkapani. Ikara posotiiretxi xika imisirienetana ninoa potxoari uinitikiri takaõtxikare auaítotakini. Imisirienetana ninoa iua kai kamakori teosonetakani. Iua potxoari uiniti pokíkaãtakari, isãkire sãpiretakari pakini, auãkipanika okaãka ipoa atoko inakarimoni, êxópiri arikiniãtaã. ²¹Isotatoneakori okapeêka iouataã, kavaro kasarori nopini topākakari namaãkeroã. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

Mio Anokanansaaki

20 ¹Eereka nitikari Teoso nitiri katxakaãpotini Teoso tixine íkari. Iuakoã iua minaro xavi iua mamapotõkire irikitimoni. Apaka iminari kohëtxi mitari. ²Iuasaaki imaíkari iua imini mitapoari. Kitxakapiríkarikara iua imini. Iua maerekani matamatakoni auíte, Satanasi inakori. Iua maíkari Satanasi. Iaxirikari kohëtxiã, mio anokanani imatípokotakani tíkane. ³Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti áki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko áki iua Satanasi. Mio ano napaãka atoko auiritaãka ipokíkini. Mapaõtinoka auiritaãka mapara auini.

⁴Eereka natamatari auítetxiakori topanere. Kaiãopokori auari iuaã. Natamatari iua topanerexi nopini topākakani. Ninoa txíkitaãka auítetxi ininiuana. Iuasaaki natamatari apanakini kãkiti. Mítxi saukanopítakoni. Okapeêkana Xesosi iokanapirena, Teoso sãkire pakini isãpiretinina xika. !Iteosonetarina iua potxoari uinitikiri. Iua kai kamakori liteosonetana. Iua potxoari uinitikiri takaõtxikare !itakana iteëtaãna, iuakoãna pakini. Iuaíkana auapekana. Auítetxi itxapekauana Kristokata. Mio anokanani auítetxi itxauana. ⁵Ikara ipíkani õkitikiko merepanika ipíkani õkitikiko. Iua mio anokanani napaãka atoko apanakini ipíkani õkitikaãka. ⁶Ipíkani merepanika õkitikiko iuaíkana auãki ininina íkapani, Teoso nakitiakori itxauana ninoa. Teoso sikari erekari ninoamoni. !Atatsiitarina ãtião ipíkixi

Teoso misiritakasaakina maerekati kamakani. Sasetotxi itxauana, kotxi Teoso nireēkiti ikamana. Kristo nireēkiti apaka ikamana. Mio anokanani auítetxi itxauana Teosokata.

Satanasi Xamina Mitapoarimoni Okiko

⁷Mio ano napaãka atoko, Satanasi kateia áki auakari, sikakaãkako. Ipokíka mapara. ⁸Iuusaaki Satanasi ípirixititari itixi kãkiti ikini áti uãka imisirienetini íkapani. Iua misãkiretari áti uãka Koki inakori, Makoki inakori pakini. Txamari na atão isãkire. Inirekari ninoa neenamauatini iuakata. Apitiitana ninoa Teoso nakitiakori inaiatinina íkapani. Itori kãkiti Satanasi apotiitakini. Uini ikipatxite atoko itxana.

⁹Ípirixititarina itixi. Iakirokarina Teoso tiretakiti sitatxiti, kãkiti Teoso nakitiakori auiniãtaã. Iuusaaki xamina iaxitikiri katxaka. Ixipokana ninoa ikinikana. ¹⁰Iuusaaki Satanasi, kãkiti misirienetakari, okaãka arikatxi mitapoarimoni éxópiri arikikoãtaã. Iua potxoari uinitikiri, isãkire sãpiretakari pakini okapeëkaika iuaã. Iuaã ninoa atatsiirauatapíkako pokamara, íkanõka átipirika. !Ixipoka ninoa atatsiirauatini.

Ipinakani Apakapari Iparíkana Íki

¹¹Eereka natamatari auítetxi topanere kasarori mitari. Natamatari iua inopini topãkakari. Iuusaaki patimari iaxiti, itixi pakini ereëkokini iua topãkakari apisatoõ. Iaxiti, itixi pakini kona katamatikoikari.

¹²Iposo atoko natamatari kãkiti mitxi ipinakani timini Teoso topanere apisatoõ. Kãkiti apiarini, kãkiti poiãorini pakini tima Teoso apisatoõ. Iposo atoko itori aãtsopa katamëkitataãka. Iua aãtsopaã aua ikinika kãkiti kamakiti. Apaka áti aãtsopa katamëkaãka. Kãkiti uãka aua iua aãtsopaã Teosokata auakani íkapani. Iuusaaki ninoa mitxi ipinakani apakapari ikamakitina íki uai itixiã auakasaakina. ¹³Ninoa mitxi potxoari uiniti áki ipinakani apoka iuaã. Mitxi kipatxiã ikatakoni apaka apoka iuaã. Ikini kãkiti ipíkani auiniãtaã auakani apoka iuaã. Ikinika apakapari ikamakitina íki, ikamakitina itixiã auakasaakina.

¹⁴Eereka ipíkixi, ipíkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaíkana kãkiti ipina átião ipíkixi maxipokatimoni. ¹⁵Kãkiti átipirika Teosokata auakani uãka aua Teoso aãtsopateë. Kãkiti iuaã mauauãkatakani okaãka iua arikatximoni.

Iaxiti, Itixi Pakini Amaneri Txapekaua

21 ¹Eereka natamatari iaxiti amaneri, itixi amaneri pakini. Iaxiti mitxiri ereëkokape. Ìkora itixi mitxiri ereëkokape. Potxoari uiniti !auaika. ²Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniātari iua sitatxi ìkorapokoriti apokini. Natamatari ikatxakaāpotini. Iua sitatxi peereri. Sito ìtaniriuatakasaaki, omāka peereri oitanirimoni osini ìkapani. Oa sito erero atoko itxa iua sitatxi. ³Nikenakotari Teoso topanereë auakari sākire. Itapasākireritika itxari:

—Uatxa Teoso kamari iua auini kākiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴Iuasaaki iua kaxipokariko ninoa oki ātsaā. !Itxiapataikana. Ipikitxi !auaika. Matinanitxi !auaika. Ātsaātxi !auaika. Katsiiri !auaika. Ikinipoko mitxiri ereëkokapeka uatxa —itxa.

⁵Iua auītetxi topanere nopini topākakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piōkatsopatari nisākire, kotxi nisākire atāo. Nisāpiretakiti apokapitikako.

⁶Apikomoni itxano:

—Uatxa nipařika xipopeka. !Auaika. Merepitipanika iōka Aopa inakori atoko nitxa, kotxi nota merepitipanika aua. Imapotōkire iōka Ómika inakori atoko nitxa, kotxi ikinipoko mapotōkire nitxaua apaka. Nisikari kākiti posonatakani iātini ìkapani. Na ninirekari ìiki. Iātarinako āparaā amomoākiri. Iua āparaā txīkitakari kākiti ātipirika Teosokata auini. ⁷Nisikariko iua āparaā kākiti Satanasi nireēkiti makamakanimoni. Ninoa Teosone nitxaua nota. Nota anaakori itxauanako ninoa. ⁸Kākiti mataparaxinireni okaākako xamina mitarimoni. Teoso sākire mauikakani apaka okaākako iua xaminamoni. Maerekati potxitakani, kokanirini, maerekati iitoāna potxitakiti kamakani apaka okaākako xamina mitapoarimoni. Miīti apaka okaākako iuamoni. Teoso kamakori teosonetakani okaākako iuamoni. Ikinika kākiti maxikatiīka sāpiretakani apaka okaākako xamina mitarimoni. Ninoa kākiti ikinikana misiritaākako arikatxi mitariā, ēxópiri arikikoātaā. Iuaā kākiti iuaīkana ipina, ātiāo ipīkitxi maxipokatimoni —itxa iua auītetxi topanere nopini topākakari sākire.

Xerosareë Sitatxiti Amaneri

⁹Ninoa Teoso nitiriakori setxi, iātatxi setxi auakini, āti ina notamoni. Iua txari:

—Uai pina. Noerekaiko pite iua Soti Auīte tiretakito ĩtanoro ĩkapani —itxa.

¹⁰Iua Erekarī Matamatakoti anikano nota. Itxīkitakari Teoso nitiri anikinino oxiratari nopini. Mitaxiratariā oerekano sitatxi Teoso nakiti Xerosareë inakori. Natamatari iua sitatxi Teoso tixine potorikakari katxakaāpotini ĩkorapokoritimoni. ¹¹Teoso iotximeretxikana aua iua sitatxi. Kai pomēkoriri kakaroneri xāsipi inakori mēkorīkini atoko itxa iotximere. Iua sitatxi iotximere peereri. Kristao mēkori atoko itxa. ¹²Pirikeri kai kamakori piriketari iua sitatxi. Iua pirikeri mitapoari, paītanori. Iua pirikeri tosi itore aua. Teoso nitiriakori iaxitikini tosi nīkatari iua tosi itore. Ikinika itore nopini iōkataāka Isaeo anaakori uāka, kotxi Isaeo tosi imiakori aua. ¹³Ipi āti pakini iua itore atokatxi pokīkinimoni. Ipi āti pakini iua itore atokatxi pokīkini sanaremoni. Ipi āti iua itore atokatxi pokīkini ikikomoni. Ipi āti pakini iua itore atokatxi ereēkokinimoni. ¹⁴Iua sitatxi pirikere tosi kai mitari nopini ikamaāka. Ikinika iua kai nopini Soti Auīte moianariakori uāka iōkataāka, kotxi Soti Auīte moianariakori tosi aua.

¹⁵Iua Teoso nitiri notakata sākirauatakari aua aāke oro kamakori iuakoā. Iua aāke iua sitatxi, itore, ipirikere pakini iaōtiko. ¹⁶Sitatxi tore atokatxi pokīkinimoni ipotorika. Itore atokatxi ereēkokinimoni apoka. Iaōtari ipi mio, koatrosētosi pakini kirómetro. Maioakari. Iuaīkana ipotorika sitatxi itore atokatxi pokīkini sanaremoni. Itore atokatxi pokīkini ikikomoni apoka. Iaōtari iua atokotxikana ipi mio, koatrosētosi pakini kirómetro. Eereka iaōtari sitatxi ĩtano timakari. Iua atokotxikana ipi mio, koatrosētosi pakini kirómetro. Iua Teoso nitiri iaōtari iua sitatxi iua aākeē. ¹⁷Iua Teoso nitiri iaōtari pirikeri timakari. Sesēta metro ĩtano. Teoso nitiri iaōrauata kākiti iaōrauātini atokokana. ¹⁸Iua pirikeri kai kamakori xāsipi inakori. Iua sitatxi oro kamakori. Kristao erero atoko itxa oa oro. ¹⁹Iua kai mitari pirikeri patapi auakari ipataāka ikini sereti kai soroā. Pomēkoriri, kakaroneri iua kai soro.

Āti iua kai mitari aua kai soro xāsipi inakori.

~Āti iua kai mitari aua kai soro sapira inakori.

~Āti aua ákata inakori.

~Āti aua esimeráota inakori.

²⁰~Āti kai mitari aua kai soro satónia inakori.

~Āti kai mitari aua kai soro sátxio inakori.

~Āti aua krisórito inakori.

~Āti aua periro inakori.

~Āti aua topásio inakori.

~Āti aua krisópraso inakori.

~Āti aua xasĩto inakori.

~Āti aua ametxísita inakori.

²¹Iua tosi itore tosi kai kasarori kamakori. Iua kai kasarori pérora inakoro. Iua itore átika, pérora átoka kamakori. Oro kamakori itxaua kimapori. Peereri. Pomēkoriri. Kristao atoko itxa ahoa.

²²Kona natamatari Teoso misākiretiko aikoti. !Auari iua aiko iua sitatxiã, kotxi Teoso Apiananiri kaposotiireri, iua Soti Auĩte apaka iuaã auapikana. ²³Iuaã !nirekaãka atokatxi, kasiri pakini sitatxi iopinikini ĩkapani, kotxi Teoso iotximere iopinikari ikinipoko. Iua Soti Auĩte sitatxi tirikapite atoko itxaua. ²⁴Kākiti maerekanitxi mauakini ikini āti uāka auari iua kamaraã. Kākiti ikini itixiti auakani auĩteakori apokako iuaã Teoso ipaxitinina ĩkapani, inirekakitina Teosomoni isikinina ĩkapani. ²⁵Iua sitatxi tore imatakakaãkapika. Īroāpikana kākiti. !totaãka, kotxi ĩkanōkari !auari iuaã. ²⁶Kākiti ikini itixiti auakani anikariko ikinipoko erekari iua sitatximoni Teoso ipaxitinina ĩkapani. ²⁷Kākiti maerekati kamakani !auiritaãkana ĩroinina. Ītotxi nireēkiti kamakani !auiritaãkana ĩroinina. Atão masāpiretakani apaka !auiritaãkana ĩroinina. Kākiti Teoso iōkauākatakini aātsopateē, ninoanokara auiritaãka ĩroinina iua sitatxitiã. Iua Soti Auĩte aātsopateē auauākatakani auapikako Teosokata.

Iua Āparaã Iātakari Aua

Teosokata Ātipirika

22 ¹Eereka iua Teoso nitiri oerekano sōtoāri. Iua sōtoāri mapotōkire ikiitaã Teoso itopanere aua. Apaka iua Soti Auĩte itopanere aua iuaã. Iua āparaã peereēri. Kristao mēkori

atoko itxa iua ãparaã. Iua ãparaã iãtakari !ipina. Átipirika auapika. ²Iua sitatxi apanĩkaki aua ahoa mitapoari. Iua sōtoãri sa ahoa apanĩkaki. Sōtoãri itinikata aua amãtiirinape. Iua amãtiiri tximakani !ipina. Auapikana. !Ipinaikana. Kasiri iaõka iriuata iua amãtiiri. Áti kasiriti iri átião, eereka áti kasiriti átião. Iuaĩkana áti kasiriti átião. Itxaãpota iua amãtiiri iriuatini iuaxiti. Tosi pakini kasiriti amãtiiri iriuata. Amãtiiri tsopa sikataparatarari kãkiti ito, ikinimane kãkiti itixi auakani ito.

³Teoso misiritiniri kãkiti !auaika. Teoso, Soti Auĩte pakini auĩtetxi itxauana iuaã. Teoso nitiriakori itixi auakani kamari iua nireẽkiti. ⁴Ninoa atamatariko itoõ. Teoso uãka iteẽtaãna auako. ⁵Ĩkanõka !auaika iuaxiti. Kãkiti iuaã kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaã. Kãkiti iuaã auakani auĩtetxiakori itxauana átipirika.

⁶Eereka iua Teoso nitiri txari notamoni:

—Atão nisãkire. Ia iaõka apokapitikako. Teoso Apiananiri sikari Erekari Matamatakoti isãkire sãpiretakanimoni. Iua paniãtari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sãkire.

Xesosi Kanapiriini Pirena

⁷—Hĩkenakota —itxa Xesosi. —Patimariko napokini ereẽ. Ia aãtsopa sãpiretari ereẽ nikanapiriini pirena. Kãkiti auikiniãri Teoso sãkire ia aãtsopa sãpiretakiti, apakapari erekari Teoso sikakiti —itxa Xesosi.

⁸Nota Xoão sãpiretai hĩte nitiãkiti. Nikenakotakiti apaka nisãpiretai hĩte. Ikinika nikenakotaka atoko, ikinika natamataka atoko, iusaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sãkire sãpiretakani Teoso nitiriakori itxauana. Ninoa atokokana nitxa nota. Ikini kãkiti ia aãtsopa sãpiretakiti auiãkani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniã atão —itxa Teoso nitiri sãkire.

¹⁰Iuaĩkana itxano nota:

—Ia aãtsopa sãpiretari Teoso kamakiti apokini apisapanika. Na pikipatapiri ia aãtsopa sãpiretakiti, kotxi paítiki Teoso sãkire iaõka apokapitikako. ¹¹Maerekati pikamapanika pinakasaaki, ininiã apikomoni maerekati pikama. Maerekati piíto nireëkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireëkitinoka pikaminiã, ininiã apikomoni Teoso nireëkitinoka pikama —itxa.

¹²—Híkenakota —itxa Xesosi. —Patimapaniriko napokini ereë. Nimiriko ikinimane paríka íki ninoa apakapini íkapani. ¹³Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴Teoso sikari erekari iua nireëkiti kamakanimoni. Ninoa kãkiti auiritaãkako Teoso amãtiirite itximinina auapika ininina tíkane. Auiritaãkanako íroinina Teoso sitatxineë. ¹⁵Kãkiti maerekati iítona nireëkiti kamakani !auiritaãka íroinina iua sitatxitiã. Míiti, ítanoro minakatokatika siríkakani, kokanirini pakini !auiritaãka íroinina iua sitatxitiã. Apaka kãkiti ikamakitika teosonetakani !auiritaãka íroinina iua sitatxitiã. Aãpirena potxitakani, atão minasãkiretakani pakini !auiritaãka íroinina iua sitatxitiã.

¹⁶—Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki íkaro atoko nitxa nota —itxa Xesosi.

¹⁷Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Híte ia nisãkire kenakotakanii, hítxariko:

—Uai pina.

Híte posonatakanii, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika iníkitaãkari. Ia ãparaã Teoso sikakiti kãkitimoni. Na piíkitxitari.

¹⁸Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika,

isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hïte, hïkokekiniãri hïteka sãkire Teoso sãkirekata. ¹⁹Kãkiti kipatiniãri ipixini ia Teoso sãpiretakiti iõkatsopatakori, Teoso !auritari iua tximiniri iua amãtiiri kãkiti auapininiika inïkitaãkari. !Auritari iua ãroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

²⁰Xesosi txari:

—Ia niokanapirena atão. Iposopeka napokini tïkane.

Atxari iuamoni:

—Ameẽ. Ari, uai pina Xesosi, Apiananiri.

²¹Xesosi Apiananiri sikari ikinipoko erekari ikinimane Teoso nakitiakorimoni. Ameẽ.